

'Ngoca' ikan erat hubungan masyarakat Kuala Sungga

UM 07/05/24

M/S 35

Oleh AMRAN MULUP

utusannews@mediamulia.com.my

ALOR GAJAH: Biarpun perlu meredah kolam berlumpur dengan kehadiran lintah dan pacat, ia sama sekali tidak menghalang peserta wanita menyertai pertandingan 'ngoca' ikan atau menangkap ikan menggunakan tangan.

Seramai lapan peserta menyahut cabaran bersempena program Jom Ngoca Raya Kuala Sungga Tebong di sini, kelmarin.

Peserta, Syarafiza Zahari, 24, berkata, ia pengalaman kali pertama menangkap ikan menggunakan tangan dan sangat mengujakan.

Ibu kepada dua anak itu berkata, dia tidak menyangka dapat menangkap ikan keli seberat tiga kilogram (kg), sekaligus menduduki tempat kedua



SYARAFIZA Zahari menunjukkan ikan keli yang berjaya ditangkapnya dalam pertandingan 'ngoca' ikan kategori wanita bersempena Jom Ngoca Raya Kuala Sungga, Tebong, Melaka. - UTUSAN/AMRAN MULUP

dan menerima hadiah wang tunai RM200.

"Bila dengar hadiah wang

tunai buat pemenang, itu menyebabkan saya memberanikan diri menyertai pertandingan ini.

"Geli memang geli, maklumlah terpaksa bermain lumpur, ada pula yang kata, 'hati-hati

lintah dan pacat'. Itu saya buat tidak peduli, yang penting saya hendak tangkap ikan guna tangan dan menang hadiah," katanya kepada *Utusan Malaysia*.

Pertandingan 'ngoca' ikan kategori wanita pertama kali diadakan tahun ini dengan menawarkan hadiah wang tunai RM300 untuk juara, naib juara (RM200) dan ketiga (RM100).

Seorang lagi peserta, Norlaila Maamor, 40, berkata, dia sangat berhasrat menyertai pertandingan itu yang tidak diadakan bagi kategori wanita tahun lalu.

"Bila tahun ini diadakan pertandingan, saya turut serta walaupun sebelum ini tidak pernah tangkap ikan guna tangan di kawasan tali air atau kolam.

"Memang geli meredah lumpur apa lagi ada lintah atau pacat, saya tidak peduli dan tidak sangka dapat menangkap sekekor ikan," katanya.